

Taitus

1 ¹Ē Kótóné kutó diratere whi bitu, Yesu Kerisoné dotɔyale *aposel* whi Pol-né dapó. Atéro dotɔyaleteita haɓe mei, Kótóné ama sorokó su yóló betero betere so whiné Talepaae tuɛ tiki tiróo, kale bete mole fo tuɛ yóo, yópóló ɛ dotɔyalepó. Ai bete mole mo fo wisi diriyóló kisiparu, tuɛ tiki tiróló Talené ala eraté fu betera. ²Ti tuɛ tiki tiratere alaró mo bete mole fo diriyóló kisipare alatamota, take nalopaae mo wisi ala tuamó betaalopóló, mutere tuɛ tó mó belera. Ti ai alata, kapala fo mo sawakélé eneitere Kótóné saró haetamo kaaraa teópa, mo taketitei yóló munélipakalepó. ³Da aluyaosóro tao su betere Kótóné ama fo wisi epaae mo wisiyóló kaae taru, so whipaae yó male fae depa, ya lo yó maleteiné Kótóné ama mo eraalopóló tukóló muló betere be demótóro ama yóló mulale fo haɓearalepó.

⁴Taitus-ó, ya lo i dere aɓeta, damo wusuró mo betá fotóro wosóló Talepaae tuɛ tiki tiró betere alakélé betá ala ereteiné ya ya lo hosaa mo turó mole naalepa i dere ape. Dané aya Kótóro da tao sóro wisiró betere whi Yesu Kerisotamoné hamokoróló tao sere alaró hosaa muni deóló dua betere alatamo ya tuapaae erópóló yae.

Atimané diyaai yale kutórape kemerópóló Tatus Krit-mó beterae fo

⁵Ē faairaalu, ya weiné bopéro daaló betere hae Krit-mó beteróló fele bete i ape. Mepaae diyóló kemeréni, kwia mupa taarale kutórape naao donoróló diyóló kemeróo, ai hae kwiamó te mole be huluamó betere Keriso so whi tetéroló kaae tawaaire whi disirape sóro beteraté kweyóo, yópóló taaróló felepó. ⁶So whi tetéroló kaae tawaaire whi disi sóro beteratepa, i ala ere whi sóro beterae. Me dowi ala yalepóló só derénitere whi betóo, sokélé mo betátóro dokóo, ama naale senaalekélé Talepaae tuɛ tiki tiró betóo, mepaae so whiné ama naale senaale hama alima aomó bitini dowaae fóló, atimané tó tiki felé yaaire ala du betepa, só deratere fo ini yóo, dere whi sóro beterae. ⁷Atéro beterate whita, Kótóné ama dirae yale kutó tetéroló kaae tareteiné mepaae whiné me dowi ala yalepóló só deratere fo ó mepaae whiné dere fo woseni dowaae furaalu, ama kisipa mole alatóro sya fole whi ó hapale fopaae butere

whi ó wain wei mo dekéro nokole whi ó hapale fopaae buturaalu hõle sere whi ó doasi *moni* saai ekõleru, kapala ala du betepa, ti atere whi beteranenipó. ⁸Ai dosayale alarape ini, uké whi wisiyóló dape sóo, wisi ala maaté yaai ekõle yóo, ama tikiné ekõlere ala ini, a amatei teteróló kaae tawóo, ama dere ala fea mo donotóro yóo, Talené ama ala erópóló, kae betero betere whi betóo, yaaitere alarape taleyóló mo bete mole alatóro yó tare whi betóo epa, ti so whi teteróló kaae tanópóló, sóro beterae. ⁹Térapa, kale bete mole mo fo mené yapaae yó melaletai diriyóló tuõru, mepaae so whi ketekõ bulóo, ai fotamo bóe du betere so whi donoróo, enére whitóro sóro beterae.

¹⁰Ti hãle hõko whi sóro beteraõse dere fota, ti i betené dapó. Kale mo fo wisitamo bóe du betere whirapekélé, bete muni hãle hõko fo du betere whirapekélé, kapala fo yóló so whi dilikitu betere whirapekélé fea betó mole tuãmó tiki sekaõ tikaie du betere whirape mo dekéro betó moleteiné dapó. ¹¹Atimané du betere alata, enénire fotei ai yó mótu betere ape. Aita hãle dumi, kapala so whi dilikóló *moni* saai du beteraó. Atéro yó mótu betere foné betã whiné ama soró naale senaaletamokélé, ama fake whikélé, atima fea betã be dolomó betó moletei ai dorótu betere ape. Atétu betere ala momó kae yaõsóro, mo taalae yóló foné sae. ¹²Ti ai Krit haemó betó mole whirape atimané fo eratere kóló whi betãné i fo erapó. “Weiné bopéro daaló betere Kiriti haemó betó mole so whi fea kapala fo buóo, hupu haõné dere kaae, dowi ala hãkeamó hõko yóo, deokayóló bitu õla maaté dekéro naai ekõle yóo, du beteraó,” ¹³⁻¹⁴Atimané fo eratere kóló whiné i alarape du betepa kelalepó dere fota ti mo dapó. Térapa, Taitus-ó, naao teteróló kaae tare so whi atimané tuõ tiki mo diriyóló tirópóló, Juda fake so whiné dolãa foró kale mo bete mole fo hõrale whirapéné i ala yae dere fotamo wosaõsóro, mo deteraa yóló atima foné sóro ma yae. ¹⁵Mepaae wisi tuétóro mole whi atimané dere alaró dere fotamokélé, mo wisiyóló du beteraó. Téretei, mepaae whi tuõ tiki tiró bitiniru, atimané hosaa tuãmó dowi kisipa mupa, ti ama dere foró dere alatamokélé wisini, mo turó dorapó. Ti i dere fota, mo dapó. Atimané tuõ tikiró hosaa tuãmó mole alatamota, wuliné api fulukó fóló õla wisi dorótu dere kaae, dowi alané atima mo ti doró beteraó. ¹⁶Ti Kótó tuõrapó du betepatei, atimané dere alané ti Kótó tuõnipóló hãkeamó yó matapó. Atima mo sonaalei ala du betere so whi betóo, dere fokélé woseni, tikóo du bitu, wisi ala yaaire mo sũnipó.

**Sere otere ó teó so whipaae Talené bete mole
fo etéro yó manérapóló ere fo**

2 ¹Naao fo yó móturaalu, kae kae fotamo touróló yó meni, Kótóné mo bete mole fotóro erótu betae. ²Atéro yó móturaalu, mepaae hãle Keriso maaté betere whi disirape atimané dere ala sawa tétitóro

yoo, nokole ɔlakélé kisipa tekeyólo tétitóro nóo, so whiné atima dere ala kilituraalu, mo donoi ala dapólo doi muloo, atimané mepaae ala yaai fopaae hapale buni, hotowaró kaae taru, tuɕ tekeyólo yoo, Talepaae tuɕ tiki tiratere alakélé, yaala sóko fole alakélé, Talené ala taaréni, haɓe yó tare alakélé mo diriyólo kisiparu, erótu betere whítóro beterópólo, ma fo yae.

³Até dere kaae, so disirapepaaekélé, atimané dere ala Talené so whiné dere alatóro du beterópólo yae. Téturaalu, so whi eratere fo ó *wain* wéi dekéro naai ekɓe ini, mo wisi fo maaté yó mótu beterópólo ma yae.

⁴Téturaalu, ai so disirapenémo mepaae teó sorape atimané whiró naale senaaletamopaae yaala sóko fole ala du beterópólo, etéro yae yólo yó manérápó. ⁵Atimané me ala yaai fopaae butere ala hapale ini, hotowaró kaae taru, tuɕ tekeyólo mo wisi alatóro yoo, bemó ɔla bilitere alakélé, naale senaale kaae tatere alakélé, be kaae tatere alakélé, mo kelaalo kokɔi alaró hosaa tuɔmó me kisipa muni, mo wisi kisipa betɔ muólo, atimané whi aɔmó beterópólo ma fo yae. Ama fo yae deretei haɓe meipó. Atimané du betere ala mepaae so whiné kilituraalu, Kótóné fo bete muni nisyólo doka doka yólo faleyaɔsóro dapó.

⁶Whi disiró so disitamopaae yale fo kaae, teó whipaaekélé atimané mepaae ala yaai tuɕ tekeyólo hotowaró yópólo, ma fo yae. ⁷Naa du betere wisi ala so whiné kolólo, atimané tokólo yópólo, yó mótu folosóro naaopi yae. Atéro, naa yó matere fomo kae yoo, dere alakélé kae yoo ini, mo betɔ alatóro erópólo yae. Téturaalu, i ala tómó mole ala kaae aɔréni, mo bete mole alapólo tuɕ muólo yó mótu betae. ⁸Atétepa, ti naa yó matere fo atimané wosaalomeipólo, mené só deratere ala enénipó. Ti noa yaɔsóro du meipó. Yaɔtamo bóe du betere whirapené da haɔsóko fole ala initepa kilitu, atimané yale fomó atimatei hale yópólo dapó.

⁹⁻¹⁰Atéturaalu, wae sóro kutó diratere so whirapepaaekélé atima tɛterólo kaae tare whi aɔmó bitu, atimané tuɕ tiki felé yópólo kutó wisiyólo dirae yólo ma fo du betae. Kutó diratere whirapené atima tɛterólo kaae tare whiné dere fo woseni dowaae foo, atimané mepaae ɔla ɔlakélé ɔlémi sóo yaɔsóro yae. Aténi, atima tɛterólo kaae tare whirapené me ɔla ɔlémi nokole ala ini yoo, erae dere alakélé mo wisiyólo eróo depa kilituraalu, kutó diratere whi wisipólo tuɕ muaalopó. Atéro atimané mepaae alarape duraalu, i dere ma fo sya fólo eratepa, ama fo woseturaalu, ama fo wisita mo bete mulapólo, Tale dukirópólo dapó.

¹¹Ti noatepae, so whi aluyaɔsóro Kótóné ama hamokorólo tao sere ala mió i alimó betere so whi feané kolópólo haɔkearó beterápó. ¹²Kótó bitini nisi yólo du betere alaró i haemó ekɓeyólo du betere alatamo yae yólo sɛtepa, ai ala mo yaalo meipó yoo, mió i betere alimó mepaae ala yaai kisipa tekeyólo yoo, mepaae dere alakélé mo donotóro yoo, Kótóné ama ala haɓe eró tawoo yópólo, ai fo wisinétei dapaae yó mótu beterápó.

¹³ Də noa wisi ala kelaai həksetamo kaae tawóló betere? Də tao sere whi Yesu Keriso ąta, də tətéróló kaae tare doasi Kótó betepóló, ama kae ere dę wisinaaletamo wale ala kelaairaaalu, də haıtamo kaae tawóló i betere ape. ¹⁴ Də dowi alané dokóló muló betepa, ai sekęné ama betere betené də dupuróló ą sukąleteita, hałe meipó. Də dowi ala mo sawakélé muni, mo ama so whıtóró bitu, mo wisi alamaaté ekęle yóló deté fu beterópóló, erapó.

¹⁵ Atérapa, ai dosąayale alarapetamo naao yó mótu betepa, ti mo wisirapó. So whinė mepaae hoko alarape taalae yóló foné sóo, du betere wisi ala taaréni ketekę bulóo yae. Ti yaąta, Talenétei ama ala erópóló, sóro betero betepa, mepaae so whinė ya belei aleróló só deratepa, ai dere fo woseni, ai bete mole fo yó matere ala betą du betae.

Mo wisi ala betą erótu betae ere fo

3 ¹⁻² So whi tətéróló kaae tare *Gavman* whıraperó mepaae ala kaae tanópóló sóro betero betere whırapetamo aqmó betae yóló Kótóné so whıppae ma fo yae.

Atéturaalu, atima kale tətéróló kaae tare whırapené yae dere ala sya fóló eróo, mepaae wisi ala ketekę buóo, me whi eratere fokélé ini yóo, mepaae so whıtamo naameyóló mo dua betóo, me whi hamomané kisipa sekę yaqsóro dere ala kisipa tekeyóló yóo, bopé fake ini, deróló dua betóo erópóló ma fo du betae.

³ Take betale alimó dąkélé kisipa okoko yóló hoko bitu, ai fo wisi wosóló aqmó bitini, dowąae fóló du betale alané dą dilikitu betalepó. Atétepa, dąné tó tikiné ekęle du betale alaró kae kae du betale feléi alatamoné dą dokóló wae sóro kutó diratere whi betero beterepó. Dąné no nené dere ala kilitu, dąkélé ai ala enée yóló dei kisipa muturaalu, dąné atima hóróo, atimanékélé dą hóróo, deté fu betalepó. ⁴ Tépateti, dą tətéróló kaae tare Kótóné ama ere wisi alaró yaala sókó fole alatamo haąkearale sukamótóróti, dą aluyaqsóro ama tao salepó. ⁵ Ti ama dą tao saleteita, dąné me donoi ala depa kolóló initei, ą kolené sukutu tao sere bete bitu, tao salepó. Téturaalu, Talené ama fokóló dą ama naale senaale deyóló beteroó, Dęi Kepe Wisiné kisi whi aleróló beteroó erapó. ⁶ Talené ai Dęi Kepe Wisita, dą so whi fea tao sere whi Yesu Keriso tuąmó betepa, Talené dąppaae mo turó suniyalepó. ⁷ Atére alata, Talené ama hamokoróló tao sóro, mo donoi so whıpó ereteiné dą ai mo ti betere bete sóro taru, ama wisi wisi ala Yesumó matere kaaetóro dąmókélé matepa saalopóló haıtamo kaae taté fu beterópóló erapó. ⁸ Ai fota, mo bete mulapóló tuę tiki tiraaire fopa, mió Kótópaae tuę tiki tiró betere so whikélé ketekę buóló mo wisi alatóro du beterópóló, ai fo naao mo diriyóló tuęru, donotóro yó mótu betepa, mo wisirapó. Ti ai dosąaté wale alarape feata, wisi alatóro ereteiné so whi fea tao sóro wisiranérapó.

⁹Tépatei, kisipa okokoi wh̄irapené dóroi duraalu h̄ale h̄oko dere fokélé, d̄a deyaairalu deté wale noutererape dos̄até wou betale alakélé, Mosesné yóló muló betere fomó alale sere alaró h̄ole sere alatamoné dere fo mo wosaq̄se. Ai alarapéné, so wh̄i tao sóró wisiraaire bete mo munipó. ¹⁰Dīa bet̄a kisipa muóló betere ala mepaae wh̄iné tekeratepa, taalae yóló foné sae. Atéró foné senaalemó, naao dere fo wosenitepa, kale yale kaae momó foné sae. Ténalemókélé mo ti wosenitepa, momó kae ini, ama enére ala deté fu beterópóló mo ti taalae. ¹¹Atétere wh̄īta, dowi ala ā tūamó f̄añnuraalu, dow̄aae fóló du betere alané amatei ā ai só derótu betere ape.

Mo kemeróturaalu Pol-né Taitus-paae ape yale fo

¹²Artemas ó Tikikas yālo yā beterepaae ai dotonatapa, ātamo yā beteremó sókó wapa, ti yā d̄amo Nikapolis be huluamó hokolaa yaalopa fae. Ti mió i waaire sosóli alita, d̄amo ai bemó betepa kemeyópóló faai kisipa mutapó. ¹³Fo tokótamo depa tao sóró fo eratere wh̄ī Senasró Apolos-tamo uké furaalu sóró faaire mepaae ɔla ɔlakó yāyātepa, ti atimaamo tao sóró melae yóló i dere ape. ¹⁴Yātamo aimó betere d̄a Keriso fake so wh̄ī atima betere dok̄o nokole ɔla ó mepaae so wh̄ī tao saaire ɔla ɔla yāyāni, mo s̄umó mulópóló, kutó ketek̄e buóló diae yóló ma fo du betae.

¹⁵Imó ɛtamo betó mole so wh̄iné yāpaae k̄oleó dapó. Talepaae kisipa tiki tiró bitu, d̄apaae yaala sókó fu betere so wh̄ipaae k̄oleó yae. Térapa, Talené hamokoróló tao sere ala dīa feapaae erópóló yae.